

Na osnovu člana 10. tačka 4. Zakona o vodama Zeničko-dobojskog kantona («Službene novine ZE-DO kantona» broj 17/07) i člana 22. Statuta Općine Visoko -prečišćeni tekst («Službeni glasnik općine Visoko», broj 1/11), Općinsko vijeće na 9. sjednici održanoj dana 27.7. 2013. godine donijelo je

O D L U K U
o izgradnji, upravljanju, korištenju, zaštiti
i održavanju mjesnih vodovoda

I – OPĆE ODREDBE

Član 1.

Ovom Odlukom utvrđuje se način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području općine Visoko.

Član 2.

Vodni objekti koji služe za snabdjevanje vodom za piće naselja izvan općinskih sjedišta su mjesni vodovodi, javne česme i javni bunari.

Član 3.

Izvorišta voda koja se zahvataju radi snabdjevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdjevanje vodom stanovništva.

Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on na drugi način ne može riješiti snabdjevanje vodom.

Kaptaža i rezervoari koji su, u smislu ovog zakona, sastavni dio mjesnog vodovoda, a koji služe za prihvatanje i akumuliranje vode za piće, moraju imati propisne izolacije i ostale potrebne uređaje.

Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.

Mjesni vodovod mora imati ugrađen i propisno baždaren uređaj za mjerenje količine iskorištene vode na odvodu iz rezervoara, a ako ima više odvoda iz rezervoara na svakom odvodu.

Korisnici lokalnih vodovoda moraju imati ugrađene i propisno baždarene mjerne uređaje (vodomjere) za nekretnine priključene na lokalni vodni objekat.

Javna česma mora imati uređaj za zatvaranje vode i betonsko korito.

II – IZGRADNJA MJESNIH VODOVODA , I JAVNIH ČESMI

Član 4.

Investitor za izgradnju mjesnog vodovoda može biti mjesna zajednica, grupa građana ili građanin.

Izgradnja mjesnog vodovoda vrši se na osnovu izdate urbanističke saglasnosti odnosno odobrenja za građenje po propisima o prostornom uređenju, odnosno građenju, uz prethodno pribavljanje prethodne vodne saglasnosti i vodne saglasnosti.

Investitor izgradnje javne česme može biti mjesna zajednica, grupa građana ili građanin.

Odluku o izgradnji javne česme donosi mjesna zajednica .

Ako je investitor grupa građana ili građanin izgradnja javne česme se vrši uz saglasnost mjesne zajednice.

Član 5.

Izgradnja i rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti.

Član 6.

Ukoliko je investitor grupa građana, dužni su putem organa mjesne zajednice izabrati Građevinski odbor od najmanje tri člana.

Dužnosti i prava Građevinskog odbora su:

- pribavljanje svih, zakonima propisanih akata potrebnih za izgradnju,
- otvaranje transakcijskog računa mjesne zajednice za ovu namjenu
- organizovanje i potpisivanje «Ugovora o zajedničkoj izgradnji, koirštenju i upravljanju vodoopskrbnim objektom», koji u ime domaćinstva – korisnika potpisuje nosilac domaćinstva,
- potpisivanje ugovora sa izvođačima radova,
- vođenje evidencije o: učešću u izgradnji svakog pojedinca, prikupljenim ili utrošenim novčanim sredstvima i drugim podacima bitnim za izgradnju i kasnije korištenje objekata,
- da nakon završetka radova podnese pismeni izvještaj Savjetu mjesne zajednice .

III – UPRAVLJANJE, KORIŠTENJE, I ODRŽAVANJE MJESNIH VODOVODA I JAVNIH ČESMI

Član 7.

Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju, odnosno građenju pribavlja se vodna dozvola.

Uz zahtjev za izdavanje vodne dozvole za mjesni vodovod za koji su investitori grupa građana, podnosi se i pismeni ugovor o održavanju i iskorištavanju mjesnog vodovoda i

regulisanju svih pitanja od značaja za mjesni vodovod, koji potpisuju svi investitori tog objekta, a koji se ovjerava na sudu, općini ili kod notara i čiji se primjerak dostavlja općinskoj službi.

Član 8.

Licima koja nisu učestvovala u izgradnji mjesnog vodovoda, može se odobriti priključak na mjesni vodovod na osnovu vodne saglasnosti koju izdaje općinska služba.

Vodna saglasnost se izdaje uz pribavljeno mišljenje

- Mjesne zajednice o mogućnostima najekonomičnijeg rješavanja vodosnabdjevanja podnosioca zahtjeva
- Mišljenja komunalnog preduzeća o mogućnosti priključka na postojeći profil cijevi.

Vodnom saglasnošću odobrit će se priključak na mjesni vodovod s obzirom na količinu vode za piće, ako može da zadovolji i potrebe interesanata i ako se njihovo snabdjevanje vodom za piće ne može izvršiti na drugi (ekonomičan i racionalan) način.

Lice kome je vodnom saglasnošću odobreno priključenje na mjesni vodovod dužno je prije priključenja, odnosno korištenja vode, putem ugovora sa vlasnicima mjesnog vodovoda, regulisati plaćanje srazmjernog dijela troškova izgradnje mjesnog vodovoda i srazmjernog dijela troškova održavanja i iskorištavanja mjesnog vodovoda.

Srazmjerni dio troškova lice kojem je vodnom saglasnošću odobreno priključenje na mjesni vodovod treba da plati, u smislu stava 4. ovog člana i ne može biti veće od učešća svakog pojedinog investitora u izgradnji ili rekonstrukciji mjesnog vodovoda, u troškovima održavanja i iskorištavanja tog objekta.

Ako lice kojem je vodnom saglasnošću odobreno priključenje na mjesni vodovod ne zaključi ugovor sa vlasnicima mjesnog vodovoda o troškovima priključenja na mjesni vodovod, odnosno korištenja vode, u smislu stava 4. ovog člana, spor rješava nadležni sud.

Ako se rekonstrukcija vodovoda vrši u cilju povećanja količine vode troškove rekonstrukcije snose svi korisnici vodovoda ,a novi korisnici snose dio troškova izgradnje i rekonstrukcije vodovoda.

Ukoliko je dovoljan kapacitet izvorišta, a profil cijevi ne dozvoljava mogućnost novih priključaka finansiranje izmjena postojećeg profila vrši se po odluci zbora korisnika iz prikupljenih sredstava održavanja.

Član 9.

Gradani koji upravljaju mjesnim vodovodom dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom .

Član 10.

Sredstva prikupljena za potrošnju i održavanje vodovoda su namjenska i mogu se trošiti isključivo odlukom Savjeta mjesne zajednice .

Član 11.

Cijena korištenja vode, održavanje objekta i druge troškove neophodne za rad i funkcionisanje objekta u skladu sa prirodom njegove namjene i način prikupljanja sredstava po prijedlogu korisnika utvrđuje svojom Odlukom Savjet mjesne zajednice za svaki objekat pojedinačno a odobrava nadležna općinska služba.

Cijena vode mora osigurati pokrivanje nužnih troškova održavanja i troškove amortizacije. Po zahtjevu korisnika troškove amortizacije utvrđuje komunalno preduzeće uz naknadu.

Član 12.

Naplatu sredstava za korištenje i održavanje vrši ovlašteno lice uz izdavanje priznanice ovjerene pečatom mjesne zajednice.

Prikupljena sredstva se uplaćuju na podračun mjesne zajednice do 15-og tekućeg mjeseca, jednom ili više puta mjesečno u skladu sa prilivom sredstava.

Izveštaj o prikupljenim sredstvima sa izvodom iz banke i izvještaj uz dokaz o utrošenim sredstvima ovlašteno lice podnosi kvartalno korisnicima, a mjesnoj zajednici dva puta u toku godine (do 30.06 i 31.12.) i Općinskom vijeću jednom godišnje.

Član 13.

Ukoliko korisnik ne izvršava obaveze plaćanja i održavanja ,na osnovu podnesenog Izvještaja o izvršenim uplatama Savjet MZ-e podnosi zahtjev za pokretanje prekršajnog postupka kod nadležnog organa.

Član 14.

Svi mjesni vodovodi mogu se uz saglasnost njihovih korisnika predati na upravljanje komunalnom preduzeću .

Cijena vode isporučene iz mjesnog vodovoda ne može biti određena ispod cijene koja osigurava pokrivanje nužnih troškova za održavanje i funkcionisanje objekata mjesnog vodovoda i troškova amortizacije.

Cijenu vode vodovoda koji su predati na upravljanje komunalnom preduzeću predlaže komunalno preduzeće , a usvaja Općinsko vijeće Visoko.

..

Član 15.

Vodovodi koji su izgrađeni iz sredstava Općine, Kantona, Federacije i drugih institucija, uključivo i dokazive izdatke za naknadna proširenja i rekonstrukcije, u dijelu više od 1/2 uloženi sredstava predaju se na upravljanje komunalnom preduzeću, uz suglasnost nadležne općinske službe.

Uložena vlastita sredstva korisnika, komunalno preduzeće će kompenzirati isporukom vode bez naplate za period koji će pokrivati troškove vlastitih ulaganja građana.

Prioritete u korištenju sredstava za rekonstrukciju i izgradnju vodovoda iz svih izvora finansiranja imaju korisnici koji

- vrše redovne uplate održavanja vodovoda i o istom dostavljaju Izvještaj nadležnoj službi.
- saglasni su da rekonstruisani ili novoizgrađeni vodovod daju na upravljanje komunalnom preduzeću
- imaju dugogodišnji problem u vodosnabdjevanju.

Navedene uslove utvrđuje općinska komisija koju formira općinska načelnica, a stav komisije je obavezujući za komisiju koja utvrđuje prioritete za dodjelu sredstava.

Za apliciranje projekata za sufinansiranje izgradnje i rekonstrukcije vodovoda prema većim nivoima i drugim izvorima finansiranja mjesne zajednice su dužne pribaviti saglasnost komisije iz stava 4 ovog člana

Član 16.

Voda se mora koristiti racionalno i ekonomično. Svaki je korisnik vode dužan koristiti se vodom na način i u obimu kojim se voda čuva od rasipanja i štetnih promjena njenih osobina i omogućuje zakonsko pravo korištenja vode drugim licima.

U periodu hidrološkog minimuma (sušni period) za mjesne vodovode koji nemaju dovoljnu količinu vode korisnici lokalnog vodovoda donese Odluku o uvođenju redukcije vode.

Član 17.

U periodu hidrološkog minimuma (sušni period) koji može nastati u različitim periodima godine u naseljima sa smanjenom količinom vode zabranjena je upotreba vode iz mjesnog vodovoda i javne česme za sve druge potrebe osim za piće i sanitarne potrebe.

Maksimalna dnevna potrošnja vode u tom periodu po članu domaćinstva je 100 litara.

U periodu ekstremne suše dnevna potrošnja vode po članu može biti i manja što utvrđuje svojom Odlukom zbor korisnika vodovoda.

Protiv korisnika koji se ne pridržava Odluke o redukciji vode, po prijedlogu zbora korisnika, mjesna zajednica vodnom inspektoru podnosi prijedlog za pokretanje prekršajnog postupka.

IV ZAŠTITA VODE LOKALNOG VODOVODA I JAVNIH ČESMI

Član 18.

Zaštita izvorišta mjesnih vodovoda vrši se uspostavljanjem i održavanjem zona sanitarne zaštite u skladu sa odredbama Zakona o vodama («Službene novine ZE-DO kantona», broj 17/07) i Pravilnikom kojima je uređena ova oblast.

Član 19.

Do donošenja Odluke za zaštitu izvorišta po odredbama Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta za javno vodosnabdjevanje („Sl novine F BiH“ broj 88/12.) uspostavlja se privremena zaštita svih izvorišta u radijusu od 50 metara od postojećeg vodozahvata

U radijusu od 50 metara zabranjene su sve aktivnosti propisane Pravilnikom koji uređuje ovu oblast a odnose se na prvu zaštitnu zonu prema Pravilniku..

Objekti koji pored vodozahvata imaju izgrađene i rezervoare potrebno je zaštititi postavljanjem ograde(bodljikava žica) u prečniku od 10 metara sa betonskim stubovima minimalne visine 2 metra i sa 12 redova žice.

Član 20.

Zabranjeno je neovlaštenim licima otvaranje i zatvaranje armatura, instalacija i hidranata i ostalih uređaja mjesnih vodovoda, izuzev u slučajevima kada je to nužno u cilju sprečavanja šteta većih razmjera.

Član.21.

Korisnici mjesnih vodovoda su dužni u objekte rezervoara ugraditi hlorinatore a hlorinacija i održavanje hlorinatora se vrši pod nadzorom preduzeća registrovanog za obavljanje komunalne djelatnosti što korisnici dokazuju Ugovorom o povremenim radovima.

Član 22.

Pregled zdravstvene ispravnosti vode za piće korisnici su dužni vršiti jednom mjesečno a pregled vrši pravno lice sa kojim korisnici sačine Ugovor o monitoringu kvaliteta vode. O istom korisnici moraju obavijestiti nadležnu općinsku službu jednom mjesečno.

IV- NADZOR

Član 23.

Inspeksijski nadzor nad provođenjem ove Odluke, u skladu sa članom 129. Zakona o vodama ZE-DO kantona vrši vodna inspekcija.

V – KAZNENE ODREDBE

Član 24.

Novčanom kaznom u iznosu od 1.000,00 KM do 15.000,00 KM bit će kažnjeno za prekršaj vlasnik-upravitelj lokalnog vodovoda ako:

- 1) mjesni vodovod ne održava u funkcionalnom stanju i ne koristi ga u skladu sa njegovom prirodom i namjenom
- 2) ako dozvoli priključak na mjesni vodovod bez vodne saglasnosti nadležnog općinskog organa.
- 3) ne zaključi Ugovor o zdravstvenom pregledu vode i Ugovor o hlorinaciji vode i mjesečne izvještaje ne dostavlja općinskoj službi

Član 25 .

Novčanom kaznom u iznosu od 100,00 KM do 1.500,00 KM bit će kažnjeno za prekršaj fizičko i pravno lice-korisnik ako:

- 1) ako sa ostalim vlasnicima mjesnog vodovoda ne zaključi pismeni ugovor iz člana 7. ove Odluke,
- 2) ako licu kojem je vodnom dozvolom odobren priključak na mjesni vodovod i korištenje vode sa tog vodovoda ometa priključenje na mjesni vodovod ili mu ometa snabdijevanje vodom iz mjesnog vodovoda (član 8. ove Odluke)
- 3) ako ne obezbjeđuje finansijska sredstva i druge uslove za održavanje i funkcioniranje mjesnog vodovoda u skladu sa njegovom prirodom i namjenom (član 9. ove Odluke)
- 4) ako vrši zabranjene aktivnosti u zaštitnoj zoni mjesnog vodovoda
- 5) ako se priključi na mjesni vodovod bez vodne saglasnosti nadležnog općinskog organa.
- 6.) ako ne ugradi vodomjer
- 7.) ako ne izvršava i ne podnosi izvještaj u utrošku sredstava
- 8). ako vrši prekomjernu potrošnju vode u vrijeme hidrološkog minimuma
- 9.) ako ošteti instalacije i objekat javne česme

VI – PRELAZNE I ZAVRŠNE ODREDBE

Član 26.

Stupanjem na snagu ove Odluke prestaje da važi Odluka o izgradnji, upravljanju, korštenju, zaštiti i održavanju vodoprivrednih objekata u selima («Sl. glasnik općine Visoko», broj 7/01).

Član 27.

Ova Odluka stupa na snagu osmog dana od dana objavljivanja u «Službenom glasniku općine Visoko».

Broj: 01/1-02-208/13
27.7.2013. godine
V i s o k o

PREDSJEDAVAJUĆA
Općinskog vijeća Visoko
Mirela Mateša Bukva

